

## AUGLÝSING

### um almennar kosningar til Alþingis.

Með vísun til ákvæðis til bráðabirgða í stjórnarskipunarlögum, nr. 100 28. júní 1995, um breytingu á stjórnarskrá lýðveldisins Íslands, nr. 33 17. júní 1944, sbr. og 57. gr. laga um kosningar til Alþingis, nr. 80 16. október 1987, sbr. lög nr. 9 27. febrúar 1995, er hér með ákveðið að almennar reglulegar kosningar til Alþingis skuli fara fram 8. maí 1999.

Þetta birtist hér með til eftirbreytni öllum þeim sem hlut eiga að máli.

*Dóms- og kirkjumálaráðuneytinu, 4. mars 1999.*

**Þorsteinn Pálsson.**

*Björn Friðfinnsson.*

22. janúar 1999

Nr. 154

## REGLUR

### um mengunarmörk og aðgerðir til að draga úr mengun á vinnustöðum.

1. gr.

*Gildissvið.*

Reglur þessar gilda um alla starfsemi sem fellur undir lög nr. 46/1980 um aðbúnað, hollustuhætti og öryggi á vinnustöðum þar sem efni í mengunarmarkaskrá myndast eða eru notuð.

2. gr.

*Skilgreiningar.*

Í reglum þessum eru eftirfarandi heiti notuð samkvæmt eftirgreindum skilgreiningum: *Mengunarmörk*: Hæsta leyfilega meðaltalsmengun (tímavegið meðaltal) í andrúmslofti starfsmanna. Mengunin getur stafað af einu einstöku efni eða blöndu af efnum. Mengunarmörkin eru gefin upp með meðalgildi eða þakgildi.

*Meðalgildi*: Mengunarmörk miðuð við meðaltal yfir 8 stunda vinnudag.

*Þakgildi*: Mengunarmörk eru miðuð við meðaltal yfir 15 mínútna tímabil eða annað tiltekið tímabil.

Þó mengunarmörk séu miðuð við meðaltal yfir 8 stunda vinnudag má styrkur mengunar, á hverju tímabili (hæst 15 mínútna tímabili), aldrei fara yfir sem svarar tvisvar sinnum viðkomandi mengunarmörk.

3. gr.

*Almennt ákvæði.*

Vinnu skal skipuleggja og framkvæma þannig að mengun sé eins lítil og kostur er. Mengun í andrúmslofti starfsmanna skal ekki fara yfir mengunarmörk sem gefin eru upp í mengunarmarkaskrá. Við mengun frá fleiri en einu efni skal tekið tillit til samverkandi áhrifa. Við mat á mengunarálagi skal taka tillit til áreynslu við vinnu auk loftmengunar og einnig að sum efni geta borist inn í líkamann í gegnum húðina. Slík efni eru merkt með bókstafnum H.

Fyrir nokkur efni er unnt að meta mengun með svokölluðum líffræðilegum mælingum. Nánari upplýsingar um slíkt má fá hjá Vinnueftirliti ríkisins.